

► *Prome Minister Nel Oduber ta bisa cu*

Filomena Wong tin poesia mas bunita di locual ela presenta pa pareha Real

Gobierno ta haya cu comision mester a "screen" mihor!

ORANJESTAD - Aunke cu Prome Minister ta haya cu e bishita Real riba su mes tabata un exito rotundo, toch tin espacio pa mehora algun asunto. Asina mes e ta haya cu e comision merece tur sorto di aplauso pa nan trabao realisa den un tempo asina relampago. Tur esnan cu a duna un man tambe merece elogio di Gobierno, pasobra tur a haci cu Aruba por a saluda e pareha Real durante nan bishita di dos dia riba nos isla. Premier Oduber a haci mencion special di e trabao cu prensa den su totalidad a haci pa cu e bishita di e pareha Real cu ta algo di aplaudi.

Gobierno ta haya cu tabatin algun punto cu merece atencion pa e siguiente bishita Real. Un di nan ta cu tin cosnan cu por a bay mihor y den mayoria caso tabata cosnan cu no necesariamente tabata den man di e comision di Gobierno. Pesey mes for di awor caba Prome Minister Oduber a anuncia cu pa e siguiente bishita Real ta Gobierno mes lo tin tur cos den man y lo no delega nada na ningun sub-comision mas. Den e mesun cuadro e ta haya cu e Hulandesnan mester tene na cuenta den futuro cu na momento cu miembronan di

famia Real ta bishita nos isla, cu ta nos aki na Aruba ta dicidi riba e agenda y no nan. Prome Minister Nel Oduber a sinti cu na un dado momento tabata pone demasiado enfasis riba seguridad di e Prins Heredero siendo cu nos autoridadnan mes por cuida e miembro di famia Real mescos cu e Hulandesnan lo haci. Oduber ta haya cu na un dado momento e seguridad tabata un poco di mas y hasta a bira un estorbo pa pueblo. Pesey mes na otro ocasionnan mester defini e asunto aki mihor pa evita cu nos ta haci di mas cu seguridad di nos principe heredero.

Riba nos pregunta dicon SAR Prins Willem Alexander no a pasa den caya Betico Croes riba e ultimo dia, e prome mandatario a splica cu tabata pa diferente motibo. Kizas no a splica e Prins di e idea aki, pasobra na ningun caminda no a skibi cu lo pasa den caya grandi. Gobierno a inclui esaki riba su mes pasobra semper ta custumber di SM Reina Beatrix di pasa den caya grandi durante nan bishita. A pensa cu na final di e lunch na El Gaucho lo a simplemente pasa den caya grandi y sigui pa Tierra den Sol. Pero, segun Prome Minister Nel

Oduber, na dado momento e agenda a cai atras pisa. A pasa mucho tempo na e actividadnan y no tabatin tempo mas pa a pasa den caya Betico Croes. E otro banda di e medaya tabata cu e pareha Real tabata cansa tambe di e paramento den solo na Mariniers Kazerne e mainta ey. Pesey mes Prome Minister Nel Oduber a pidi disculpa na tur esnan cu a spera riba e pareha Real den caya grandi pasobra di berdad tabata for di nan control. E prome mandatario a splica cu durante un siguiente bishita sigur lo percura cu esaki ta inclui for di e prome dia caba den e "draaiboek".

Un otro asunto cu a bini padilanti ayera durante e conferencia di prensa semanal di Gobierno tabata e hecho cu e declamacion di poesia "Placa Mancha" di Filomena Wong no

a cai den mucho bon tera cerca hopi den nos comunidad. Prome Minister Nel Oduber a bisa den un declaracion ayera cu personalmente e ta haya cu Filomena Wong tin poesia mucho mas bunita cu esaki y cu kizas e poesia cu ela escohe no tabata un adecuado na e ocasion di bishita Real. Oduber ta haya cu si e comishon "screen" tur cos mihor, cu kizas esaki lo no a sosode hamas.

Ruben Trapenberg, Presidente di e Comishon di Bishita Real a splica na prensa cu Johnnie Fingal tabatin e parti aki den su man. A pensa riba Belen Marchena prome, pero na ultimo momento mester a busca un otro persona pa declama poesia. Fingal a busca Wong e ora ey pa e trabao y a yega na acuerdo cu otro. No tabata posibel pa haci ningun "screening" pasobra Filomena

Wong tabata sufriendo un quebrante di salud y como tal mester a warda pa ela recupera. Pesey mes Trapenberg a sigura cu den futuro lo no laga e trabao aki mas den mannan di ningun otro hende. "Y ya cu ta papiando di cosnan cu a bai robez, mi kier bisa cu na Camara di Comercio tambe cosnan tabata bruha", tabata palabranan di nos Prome Mandatario. Ela argumenta esaki cu e comishon organisador mester a haci e evento di dunamento di discurso prome cu e desvelo, pasobra na momento cu e pareha Real a bandona e sitio, tur otro hende a bai tambe. Tabata masha lamentabel pa mira Minister Nilo Swaen teniendo un discurso pa stul, pasobra tur hende a subi auto y bai asina cu e Prins no tabat'ey mas. Tipo di cosnan asina mester wordo evita den futuro.